

痛史

第二函
二十册

鹿樵紀聞卷下

桂王上

明永明王由榔。神宗之孫也。崇禎末。隨父桂王避賊梧州。及兩京浙閩相繼覆滅。其時桂王已薨。於是廣中督撫丁魁楚。瞿式耜。迎永明王肇慶。稱監國。唐王之弟聿錡。在羊城。聞之。使陳邦彥來約和。永明王召其下。問和與戰孰便。邦彥因進說曰。天潢之序。固應屬王。何和之有。然外患方興。奈何尋蹤譚。尙爲今計。不若早正大位。以一人心。魁楚然之。遂以順治三年十月僭號。改元永歷。遣彭耀往諭廣州。比至。聿錡已稱帝。執耀殺之。臘月。命瞿式耜東討聿錡。前部林佳鼎輕進敗沒。丁亥正月。王師克羊城。乘勝而西。永明王走梧州。丁魁楚爲李成棟所誘。死於簾江。是月。肇慶破。瞿式耜以永明王奔桂林。二月。太監王坤勸永明王入楚。永明王從之。出駐全州。留式耜

守桂林。三月。李成棟襲桂林。式耜與總兵焦璉力戰拒之。王師不能克。四月。武岡守將劉承胤以永明王如武岡。李成棟復攻桂林。弗克。八月。定南王兵渡洞庭。何騰蛟戰敗。自長沙南奔。永州守將曹志建亦棄永州走鎮峽。王師進駐湘潭。尙王從東路渡江攻燕子窩。總兵陳士明等迎降。耿王別率兵趨湖西。破郝永忠。從寶慶直抵武岡。劉承胤見事急。乃僞降。密使副將謝復榮以永明王奔古尼。追兵迫。復榮以五百人斷後。皆死焉。九月。王師進攻沅州。守將張璧先棄城走。永明王復自古尼走柳州。道阻。還次象州。資用乏絕。從臣狼狽。皆以青布裹頭。漸欲散去。會王師於全州失利。撤兵北去。始得復還桂林。戊子正月。金聲桓南叛。永明王命何騰蛟出全州。焦璉出平樂。郝永忠屯永安。窺長沙以應之。二月。永忠兵潰還。夜半。刼永明王於寢。裸而置之城外。大掠而去。時事起倉卒。嚴起恆、馬吉翔輩。覓布袍竹轎。奉永明王遠遁。遇水濡足。逢山扳樹。逾旬始得口南甯。式耜被刼登舟。適遇總兵周金湯、熊兆佐。自楚至。始得脫還桂林。已而騰蛟聞變。與焦璉先後引兵歸。王師乘亂攻之。不能克。三月。李

成棟及布政袁彭年。刼佟總督。以廣州南叛。使至南寧。永明王大喜。欲還肇慶。瞿式耜上言。宜且歸桂林。或暫駐梧州。不宜委身新附。使太阿倒持。不聽。閏六月。永明王發南寧。過潯州。守將陳邦傳欲爲亂。以石碎蕭琦舟。殺之。永明王脫走。八月朔日。方至肇慶。成棟來迎。封惠國公。遷佟養甲於梧州。而使張善襲殺之於路。養甲行至楊柳沙。方與客夜奕。聞善至。按槍艙口。殺十數人。善厲聲曰。公差矣。公所殺宗室諸王忠臣義士。以百千計。一死不足償。乃吝惜若此耶。養甲赴水。善擒得之。遂被磔於江中。當是時。連得二省。兵勢驟張。士人雲集。其已仕者。不曰迎鑾。卽曰扈駕。而未仕者。亦詭稱原仕以求用。袁彭年初降本朝。授廣東提學。嘗出示云。金綬垂辮。斯興朝之雅制。博帶義冠。乃亡國之陋規。至是自謂反正功第一。欲專朝政。成棟東出。留養子元胤助守。彭年知其寡識。於是崇以禮貌。屬以大權。挑其喜怒。以作威福。兩人之門。晨夕如市。肇慶士庶。乃作假山圖五虎號以譏之。元胤本賈氏子。故畫假山一座。下列朝臣累百。有以頭戴之者。有以手挾之者。有以杖支之者。有以肩背任之者。或仰

而望。或傾而聽。或指而有言。或跪而起拜。或懼而退避。山頂黑氣蒙昧。直接雲端。五虎者。劉湘客爲虎皮。蒙正發爲虎爪。金堡爲虎牙。丁時魁爲虎尾。而彭年尤橫爲頭。嘗論事王前。語不遜。王責以君臣之義。彭年勃然曰。倘向者東國以鐵騎五千席捲而西。君臣之義安在。王默然變色。行在諸臣亦皆惡之。而心憚元胤。不敢發。十月。李成棟攻贛州。敗績。臘月。何騰蛟會兵湘潭。使馬進忠救南昌。己丑正月。進忠兵潰。烏金玉襲湘潭。執何騰蛟。二月。李成棟復出攻贛州。兵敗。溺水而死。先是肇慶又得吳三桂密奏。羣下咸謂中興可望。坐致益復泄沓。惟借考選考貢。朝夕納賄。王皇親新教梨園子弟班成。文武諸臣。無日不會。酣歌恆舞。瞿式耜在桂林。累次上書。言宜君臣宵旰肅官常。作士氣。以圖恢復。莫有以爲意者。及各路敗書踵至。中外震駭。束手無策。式耜知事不可爲。於是築室仿虞山。東皋水竹之勝。顏曰小東皋。與游客賦詩飲酒。不復談經濟矣。成棟旣敗。永明王使其將杜允和代守羊城。庚寅正月。平南王兵踰梅嶺。破南雄韶州。王留李元胤守肇慶。而身奔梧州。吳貞毓、郭子奇等。乃敢劾。

五虎罪。王以彭年有反正功。削籍免議。餘四虎皆下獄。堡與時魁謫戍。湘客正發。配贖。是月。王師進攻廣州。廣城東南距珠江北有三里坊。人馬不可站立。惟城西一帶皆小麓。爲兵衝。杜允和列兵堅守。平南王攻之。不能克。是月。羅南生起兵延平。奉德化王慈曄爲主。攻陷大田龍溪等縣。四月。定南王破全州。守將吳一清退保榕江。是時永明王舟居於梧。猶行考選。中秋節。嚴起恆書水殿二字。製一牌坊。送至王舟。率羣下上表稱賀。九月。靖南王定延平。斬慈曄。降羅南生。引兵會攻廣州。西城守將范承恩因小憤開門降。允和遁入海。袁彭年時以被黜居廣。復投誠。十一月。定南王克肇慶。誅李元胤。進破嚴關。桂林兵潰。式耜賦絕命詩曰。從容待死與城亡。千古忠臣自主張。三百年來恩澤久。頭絲猶帶滿天香。城破。與張同敵皆死之。永明王復走南甯。是歲。孫可望使楊畏知至梧州貢獻。求封秦王。嚴起恆以非祖制。堅執不許。畏知因留粵不歸。辛卯正月。可望託言入衛。遣兵至南甯。殺起恆及與議阻封者十九人。執楊畏知歸滇。畏知罵賊而死。其年冬。南甯破。永明王將走鎮安。會李定國兵出靖

州將迎永明王。孫可望心忌定國。順治九年三月。使其黨鄭國遷永明王於安隆。

桂王中

永明旣遷。改安隆爲安龍府。孫可望使人監之。所供奉皆造冊呈報。內開皇帝一員。月支米若干。太子一口。宮眷八口。月支米若干。聞者莫不怪嘆。已而可望至安龍。入見。將圖不軌。王所居宮旁有古井。壓以巨石。上刻符篆。相傳張三丰鎖孽龍於宮。可望發而視之。水忽湧出。可望驚走。媚賊者曰。此龍來朝王。王呼免朝。水當退。可望且呼且走。而水來益急。幾沒可望膝。乃傳永明王命呼之。水立退。邪謀由是頓息。其年夏。李定國破沅靖武岡三州。總兵張國柱敗沒。定國進攻全州。先使其將張勝統精騎趨嚴關。七月。王師敗於驛江湖。定南王急發兵往救。而張勝已扼關口不得出。全州遂陷。定國至。大戰關下。王師破其象陣。定國斬其象奴。勒兵再戰。士皆殊死鬪。象亦直前衝突。王師大敗。桂林陷。定南王死之。定國已得桂林。使高文貴爲前鋒。乘勝而東。永州衡州皆不守。又潛兵破吉安。吳楚震動。朝廷命敬謹親王尼堪將十萬衆。

拒之。戰於衡州城下。相持四晝夜。定國敗走。而敬謹親王爲交鎗所中。沒於陣。王師復却。定國亦力竭。退屯武岡。是秋。孫可望亦出兵陷辰州。又使劉文秀寇蜀。文秀恃勝輕進。圍吳三桂於保甯。其將王復臣諫不聽。有黑煞神者。別屯城西。三桂覘其無備。先使孱兵挑之下山。而以鐵騎蹂之。黑煞神敗沒。復臣兵屯其後。亦戰死。文秀撤兵而遁。可望恥兩路無功。功名獨歸定國。責文秀愎諫取敗。假永明命落職閑住。癸巳春。可望悉師入楚。欲就定國。定國避入梧州。可望追之。道遇王師。驟而敗。乃退駐貴陽。復召文秀使守雲南。甲午春。安龍日益窮蹙。永明用吳貞毓謀。潛求迎於定國。馬吉翔洩其事。可望復使鄭國至安龍。殺貞毓及與謀者十八人。是年。定國自梧州出攻擊慶。戰敗。走保柳州。丙午春。復出破廉州。進屯端溪西岸。乙未春。破高明。東攻新會。久不克。耿尙二王及靖南將軍朱馬喇、蠡章京東拜會兵來救。定國于峽口列巨象西洋礮爲陣。別以勁兵駐左山爲沖突計。戰既合。朱馬馳鐵騎先奪左山。二王張左右翼直攻峽口。定國軍礮暗不發。羣衆皆驚逸。遂大敗。走保南甯。會求迎之使

復至。其年冬。遂自南甯赴安龍。可望聞之。使白文選刼永明入黔。文選心非可望所爲。故遲其行。俟定國至。而以不口刼歸報。可望又使至曲靖邀之。文選因與定國合謀。同舉永明而西。將至雲南。劉文秀陽與可望心腹王尙禮等議城守。而陰出見定國曰。吾輩久知孫王爲董卓。但恐誅卓之後。又有曹瞞爾。定國自明無他意。折箭爲誓。文選卽迎永明入城。可望初得雲南。卽於五華山大建宮殿。制擬京師。方落成。而震電擊其西楹。故不敢居。至是以爲行宮。僞封定國爲晉王。文秀爲蜀王。而賜文選公爵。使邊黔召可望。可望大怒。奪文選兵。丁酉春。可望大舉南犯。與李劉相持於交水。別遣馬寶、張勝以精兵出間道襲雲南。兵至城下。門猶未閉。張勝欲入。馬寶止之。沐天波等始得嚴兵爲備。王尙禮欲爲內應。不敢發。俄而交水捷音至。寶以其兵降。張勝遁去。定國追斬之。王尙禮服毒而死。定國旣逐可望。悉收其部將。餘黨王士奇、關有才等。據永昌作亂。討而誅之。自是事權始歸於一。定國性本忠勇。又深以可望爲鑑。謹守臣節。上下粗安。然自兩人交惡。頻年戰爭。猛將勁兵。十捐六七。定國銳氣

亦少衰矣。戊戌夏。王師四路進討。時劉文秀已死。永明使定國馮雙禮等扼盤江。據雞公背。使文選督竇民望等出七星關。扼天生橋。十一月。固山額眞侯墨勒根蝦與吳三桂自遵義進兵。訪土人得間道走烏撒。出至七星關後。文選棄關奔霑益。信親王多羅鋒尼與洪承疇破貴州。進至雞公背。定國戰敗。退守盤江。土司岑維祿導靖寇將軍羅託以楚兵出安龍。從南盤江直走昆明。定國選兵倍道截之。又敗。又聞固山額眞趙布大以越兵自廣南入。知勢不支。卽棄盤江走滇都。奉永明奔永昌。令白文選留守玉龍關。己亥正月。信郡王會兵破省城。文選復棄關渡瀾滄江。斷鐵索橋。吳三桂編竹牌以渡。破永昌。與趙布大合兵。急追定國。定國將決戰。先令靳統武衛永明走騰越。而身結柵磨盤山。左右設伏。布地雷以待。三桂至。見山勢險惡。未敢遽進。得降人盧桂生。始知定國虛實。於是分精卒扼伏兵處。而大隊直前攻柵。破其前屯。定國升高觀戰。見王師乘勝爭功。擠入狹徑。急督後隊死鬪。三桂騎兵迫於險。不得騁。大敗奔還。定國亦不敢追。徐收兵尾統武而西。欲至騰越。別思良策。而永明初

聞定國失利。倉卒間已由別道至緬境。入銅壁關矣。

桂王下

緬甸者。西南徼外蠻落也。其都曰阿瓦。有新舊城。中隔大江。新城在江左。緬酋所居。舊城在江右。一名者梗。尤荒僻。永明旣入緬。緬人隨集兵閉關。靳統武不得進而還。定國聞之。以北兵雖退。而夷叵測。聞文選在孟定。就而與之謀。欲各擇便地駐兵。收合散亡。聯絡土司。俟形勢稍固。然後迎復。文選謂王身處危地。兵衛單弱。稍遲恐生他變。不用定國計。定國留保孟定。文選獨從莫蠻進兵。緬酋聞之。卽移永明入阿瓦。己亥五月。永明至舊城。緬人蓋草房十數間居之。留兵百人爲衛。從臣自結草舍以居。猶各尋伴侶。攜棋牌雙陸。日夕游宴。緬民男婦往來貿易。諸臣短衣跣足。雜坐笑語。緬君臣無不目笑而心悲之。其年秋。文選兵至新城。信緬人好語。不卽攻。比覺其詐。則阿瓦守禦已固。文選知不可克。退就定國。合兵復進。緬新城三面阻江。惟東南馮陸。文選去後。緬人掘陸引水爲湖。湖內留隄三匝。外立木城以自固。定國至營三

十里外。遣使諭緬酋送王。緬人答詞甚倨。隨於木城外環立木柵。調兵實之。越數日。復立外柵。調兵實之。以漸逼定國。既而驅羣象索戰。定國將步兵擊之。戰既酣。文選引鐵騎橫冲其脇。緬兵大敗。保城不出。定國揮所獲緬將如國老等禮而歸之。復以書諭緬酋送王。又詞知永明在舊城。密遣丁仲柳於上流造船。謀襲江右。緬人不答其使。而遣輕兵襲仲柳。焚其舟。定國無如之何。乃爲久困計。分兵四下掃糧。絕其孔道。數月。城中饑窘。乃遣使來請先退兵。然後送王。定國謂文選。彼雖詐。不若姑從其請。休兵養銳。俟造舟成。東西並舉。卽拔營而退。將入洞鄔。文選先發。未半道。其部將張國用刦之來降。文選哭曰。吾負皇上及晉王矣。定國聞之亦哭曰。爲伊強圖入緬。致壞大事。今反舍我而去。追思當年兄弟。今惟伊在。何忍復自相魚肉。已矣。各行其志可也。遂獨引兵駐洞鄔。初。定國在孟定。多造印敕給諸土司。沅江那蒿石賓龍世榮等皆嚮應。定國去至孟艮。吳三桂悉討平之。然心憚定國及蠻中險遠。將還師。使人諭緬酋曰。急縛僞王來。否者我且屠阿瓦。緬小國恐。卽欲執永明以獻。慮定國等

在外。故久不決。庚子十月。三桂勒兵將擊緬。緬酋懼。先遣兵殺從臣四十餘人。惟沐天波出袖中鎚。擊殺十數人。然後死。定國聞變。以舟師至江右。緬人欲害永明。永明伺間使人報定國曰。事已不可爲。致謝晉王。宜爲自計。勿以我爲念。定國及將士皆下馬哭拜而返。臘月。三桂兵至阿瓦。營於城東之舊晚。緬相錫直持貝葉緬文來降。卽日託言遷居。脅永明過江。行百餘里。至三桂營。三桂初見甚倨。永明問曰。若爲誰。三桂一時口噤不能對。再問之。不覺屈膝伏地。王曰。我知之矣。他不必言。猶思歸骨於祖宗陵墓。知卿能任此乎。三桂強應曰能。左右扶出。汗流浹背。色如死灰。辛丑正月。永明至雲南。舊臣龔彝求見。三桂許之。具饌飲酒。永明痛哭稱謝不能飲。彝亦哭拜不能起。久之再勸王飲。永明勉卒三爵。彝拜且哭。觸階而死。定國治兵洞郎。謀邀三桂。旣不及。復遇大疫。人馬死者大半。乃齋戒作表告上帝。自陳反正輔明。出於誠心。若國祚告終。孤臣回天無力。乞速賜死。毋久害此軍民。焚表未幾而疾作。及聞永明父子以四月二十五日死於雲南。一慟而絕。天波黔甯王英十一世孫沙定洲亂。

後。不復任事。自永明至滇。始仍以世臣受寄。永明南遁。緬人守關不納。永明使天波往諭。緬人聞沐國公來。猶下馬羅拜也。天波三子度國勢既去。先使分贅諸土司。比天波入緬。而二子先後病死。惟長子忠顯隨婦翁龍世榮出降。未幾。有梅道人者謀作亂。假忠顯書投甯州祿昌賢。事發。忠顯知不免。其妻方有妊。乃使內官勝九德引之出。詭稱進香。浮舟遠遁。忠顯被逮。以婢夏蓮爲龍氏。而眞龍氏後果生男。名曰神保。康熙四年。土酋王耀祖作亂。迎龍氏母子入山。後亦捕獲解京。

粵東三烈

陳子壯字集生。號秋濤。廣東南海人。萬歷己未。以探花授編修。天啟甲子。忤璫削籍。崇禎立。起原官。累遷少宗伯。因爭宗人授事。復黜。子壯爲人長身巨口。美鬚髯。秀眉目。清言醞藉。雅爲風流所宗。罷官後。閉門謝客。獨見順德陳令斌。邦彥之文而奇之。延至家。使訓諸子。邦彥感子壯之知己也。亦以師禮事子壯。其遊若父子然。相得懽甚。邦彥慷慨有大節。雙目炯炯。視日不眩。爲諸生。四十未遇。居錦巖教授。甲申之變。

志欲殉國。於是別子壯。謝生徒。草中興政要數萬言。走江甯上之。不用。唐王讀其書而偉之。既自立。卽其家授監紀推官。未任。舉於鄉。與張家玉同事唐王。家玉者東莞人。字元子。號芷園。癸未進士。選庶常。初陷賊中。設詭詞求見。及見。長揖不跪。賊使卒脅以白刃。曰降否。家玉曰不降。曰不降將劓汝。家玉又曰不降。曰不降將劓汝父母。家玉始跪。賊乃釋之。卽伺間南遁。福王定從逆諸臣罪。阮大鍼惡其依附東林。將列之五等。有爲之力辨者。始得放歸。黃道周薦之唐王。授侍講。上疏陳江右剿撫事宜。唐王然之。命監鄭彩兵救撫州。而邦彥以部屬隨蘇觀生駐贛州。彩進至廣信。畏敵不敢前。家玉結健將四人。各領死士爲先驅。方與王師遇。而彩已捲旆東奔。兵遂敗。家玉走新城。墜馬折臂。自請募兵潮惠。至鎮平。賴寄肖以其衆萬餘人從之。又招降劇盜黃海。得兵數萬。氣稍振。聞福汀事急。率之往赴。王師邀擊破之。家玉衆散。亡歸東莞。邦彥數爲觀生畫策。不用。福州破。觀生遁入羊城。聞永明王稱監國。使邦彥奉表至肇慶勸進。已行而觀生意中變。別奉聿錫。永明王夜召邦彥決策太后前。邦彥

請王急正大位以繫人心。發南雄勁卒取韶州。制粵東十郡之七。而委其三於唐王。使代我受敵。而徐乘其敵。丁魁楚輩皆以爲然。於是擢邦彥兵科給事中。齎勅還諭觀生。至廣州。彭耀先往被殺。邦彥遂不敢入城。變姓名稱林居士。匿高明山中。順治四年正月。李成棟破廣州。西追永明。當是時。子壯已起兵邑之九江村。其兵多蛋戶番鬼。善戰。聞邦彥在高明。急使人召之。謂曰。成不成天也。姑置勿計。但得牽制成棟。使毋遽西。則潯梧有備矣。初。萬元吉遣族人萬年募兵於廣。得余龍等千餘人。未行而元吉敗。龍等無所歸。聚甘竹灘爲盜。聚衆至二萬餘人。邦彥乃與子壯謀。使同邑諸生馬應芳說余龍攻廣州。永明藉是得脫至桂林。及余龍敗死。邦彥撫其餘衆。行收兵至高明。麥而炫等皆從之。當是時。家玉亦與舉人韓如璜起兵劉濬。據東莞。籍前尙書李覺斯等資以犒士。進破新安。殺其令鄭鋆。與家玉東西相應。其年夏。子壯約邦彥攻廣州。先結指揮楊可觀爲內應。又使花山盜詐降以助之。期於七夕內外並發。子壯先期一日。連舟千艘直薄西城。奪其礮臺。可觀等謀洩。佟總督悉收斬之。

而飛騎召成棟還。蓋其時成棟方攻家玉於新安也。翌日。邦彥至城東。知可觀等死。度李兵夜當過禺珠。先伏舟以待。而使人報子壯曰。敵未必遭我火。恐其餘衆奔突。請嚴陣以待。青旗而朱旂者。我兵也。子壯得報。不卽傳令。其夜王師果至。火舟飄颻。起蒲葦間。焚其巨艦十數。李成棟乘輕舸且戰且走。邦彥尾而擊之。環城而西。平明迫子壯軍。城中亦登陣鳴鼓助呼。喧聲雷動。子壯兵皆烏合。遙望帆檣千翼蔽江而上。以爲皆北兵也。陣動。子壯急傳令。而後軍已走。王師乘之。前軍亦潰。邦彥不敢攻城。全師走三水。破其城。殺知縣陳億。復助麥而炫復高明。已而清遠指揮白嘗燦與諸生朱學熙。殺副使于玉華。以城迎。邦彥乃口兵至江上。立柵以自固。成棟旣破子壯。與佟總督謀。以家玉在東。依山爲壘。畏我騎兵。決不自至。邦彥居上流。舟師剽疾。若大兵東出。彼不乘廣州之虛。必遠連西越之衆。乃使偏師綴家玉。而先討邦彥。八月之末。王師至清遠。邦彥使霍師連乘風駕火舟迎戰。成棟敗走。俄而風返。成棟回兵蹙之。火舟迫柵不得入。師連之衆殲焉。清遠破。邦彥帥死士巷戰。身被三刀。走入